

# Yunamentu

Karnaval ta tras di lomba. Bientu fuerte ta kòrda nos ku temporada di kuaresma t'aki. Huntu ku kuaresma ta bin diferente komentario tokante yunamentu.

Yunamentu ta konosí serka diferente religion. Talbes nan ta apstené di kuminda riba sierto fecha tur aña. Of nan por enkurashá nan fielnan pa yuna sierto dia kada siman. Durante di nuebe luna di kalènder islámiko, Ramadan, muslimnan no ta kome ni bebe fo'i salí di solo te ora solo baha. Hudiunan, budistanan, hindunan i otronan tambe sa yuna.

Segun nos ta komprendé, dia 17 di febrüari 1966, papa Pablo VI a kita sierto restriksion relashoná pa ku yunamentu durante Kuaresma. Mester yuna sigur Djarason di Shinishi i Bièrna Santu. Piská, ma no otro karni, ta pèrmisibel djabièrna.

Ma yunamentu ta mal komprendé. Hopi hende ta konsiderá yunamentu simpelmente un rito ku nan religion ta eksigí. Algun ta mir'é komo un demonstrashon di nan deboshon, i nan ta deseoso pa hende mira kon deboto nan ta! Hesus a yama hende asina “hipokríta”. El a bisa, “*Ma abo, ora bo ta yuna, hunta bo kabes ku zeta i laba bo kara, pa hende no mira ku bo ta yuna, sino solamente bo Tata ku ta den skondí; i bo Tata, ku ta mira den skondí, lo rekompensábo*” (Mateo 6:16-18).

Otronan ta usa yunamentu kasi manera un wèlga di hamber, keriendo ku nan apsteneshon di kuminda lo pone preshon riba Dios, obligando E pa duna nan nan gana. Ma nan ta malamente kiboká. Ningun hende por obligá Dios Todopoderoso pa kai na nan pena dor di keda sin kome.

Hesus tabatin un persepektiva korekto pa ku kuminda. Na un okashon, e apòstelnan a trese kuminda pa Hesus. El a nenga kome e momentu ei bisando, “*Mi kuminda ta pa hasi boluntat di Esun ku a mandaMi*” (Juan 4:34). **Obedensia na Dios tabata mas importante p'E ku kuminda. Tin momentu ku ta inapropiá pa kome**—momentunan ku otro kos tin mas prioridat riba un barika yen.

Tin hopi ehèmpel di momentunan asina den Beibel... momentunan ku hende a apstené di kuminda fuera di fechanan programá riba kalènder religioso. Por pone e okashonnan aki den dos grupo general.

1) **Yunamentu deseando un favor di Dios.** Tin hopi ehèmpel den Palabra di Dios di hende ku a yuna hasiendo un petishon di Dios. Talbes nan a pidi pa viktoría den bataya, protekshon, guiansa, sanashon òf otro nesesidat urgente. Ta na su lugá pa pone kuminda un banda ora nos ta desesperá pa Dios hasi algu den nos bida ku E so por hasi!

2) **Yunamentu pa motibu di tristesa.** Ta algu masha normal pa pèrdè apetit ora nos ta tristu. Ken tin hamber ora un ser kerí ta fayesé?

Ma tin otro tristesa ku ta okashon pa pone kuminda un banda: tristesa pa piká. **Poko hende ta yuna pasobra nan ta konsiente ku nan piká a ofendé Dios santu. Nan ta tuma piká komo un kos hewon. E no ta duel nan.** Di bèrdat, si bo ta haña un bista chikitu kon serio Dios ta mira bo piká, sigur e lo kita bo apetit! Repentimentu—bira di bo piká—mester ta bo reakshon. Ta ku e mentalidat ei ku Dios a invitá Su pueblo, “*bolbe serka Mi ku henter boso kurason, i ku yunamentu, yoramentu i lamentashon*” (Joel 2:12).

**Ki dia tabata último biaha ku BO piká a kibrábo? Ki dia tabata último biaha ku bo a yuna pa motibu di BO piká?** E Kuaresma aki por ta un bon oportunidat pa reflehá riba bo piká, e rabia di Dios kontra bo piká, i Dios Su amor tan grandi ku El a manda Hesus pa tuma e kastigu ku bo ta meresé pa bo piká.

Yuna djis pa yuna tin poko benefisio. Ma yunamentu ku ta pone Dios promé den bo bida si tin balor.